

Estudu Kazu 1 - Divorsu no Violensia Domestika

Luiza kaben ona tinan 10 liu ba tuir lei tradisional no iha oan nain hat. Nia nunka kaben iha igreza ka registru ho governu maibé ninia komunidade konsidera nia kaben ona. Nia hela hamutuk ho ninia laen-kaben no nia familia iha Dili no Luiza nia familia hela iha Baucau. Luiza servisu hanesan ema dasa rai iha kantor ida. Ninia laen-kaben servisu hanesan karpenteiru.

Luiza simu violensia domestika hosi ni-nia laen-kaben. Dala rumia tenki ba ospital tanba sai vitima ba nia laen. Dalaruma ninia kaben mos baku sira nia oan.

Luiza hakarak divorsia maibe nia preokupadu tanba nia lahatene oinsa atu hetan asistensia no nia mos tauk karik nia la iha osan atu hakiak oan sira. Ni-nia laenkaben dehan ba nia katak se nia prosesa kazu ne'e ba Tribunal, nia sei laiha direitu ba labarik sira. Luiza hasoru situasaun dilematiku tanba la bele fila ba ninia familia, ho razaun nia sei hamoe ni familia sira.

Perguntas:

1. Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?
 2. Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?
 3. Saidu mak Parlamentu tenki inklui iha lei atu resolve situasaun ida ne'e ho diak?

Artigu ne'ebé karik relevante:

Art 1467: Nosqun Kazamento njan:

Art 1475 & 1478: Kazamentu sivil, katoliku no tradisional monogamiku:

Art 1650: Modalidade divorciu:

Art 1656: Divorsiu litigiozu

Estudu Kazu 2 - Barlake

Jinha fetoran tinan 22 ne'ebé mak namora ho Mario, sira nain rua namora tinan rua ona no hakarak seriu ho relasaun ne'e. Sira nain rua nia familia tu'ur hamutuk atu koalia konabá sira nia relasaun ne'e (simu mane foun). Iha eventu simu mane foun ne'e, lao ladun diak tanba husi parte Jinha nian husu barlake aas tebes (karau 77 ho osan) ba parte Mario nia familia. Sira rua nia familia mos desidi atu fo uluk balun no seluk fali sei fo tuir mai (tahap per tahap).

Tanba fo ona barlake balun, Mario nia familia hodi Jinha ba nia uma no sira nain rua moris hamutuk nudar fen-laen. Sira rua nia moris ladun feliz tanba Mario persija servisu makaas atu selu barlake ba Jinha nia familia, no tanba barlake ne mos Mario nia familia boot tau hamutuk osan no riku soin atu fo ba Jinha nia familia, entaun famila mos komesa tau ibun ba Jinha. Nune'e dala barak Jinha ho Mario histori malu no baku malu bebeik.

Perguntas:

1. Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?
 2. Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?
 3. Saida mak Parlamentu tenki inklui iha lei atu resolve situasaun ida ne'e ho diak?

Artiqu ne'ebé karik relevante:

Art 1467: Nosaun Kazamentu nian;

Art 1475 & 1478: Kazamentu sivil, katoliku no tradisional monogamiku;

Art 1480 & 1481: Promesa ba kazamentu

Art 1630, 1631, 1637, 1638: Doasaun ne'ebé fó ba kazamento

Estuda Kazu 3 – Paternidade no Alimentu

Joana fetoran tinan 17 no hela iha Oecusse. Nia iha namoradu naran Juao ne'ebe tinan 25. Iha sira nia relasaun rezulta Joana sai isin rua no nia hatete katak Joao mak aman ba bebe oan ne'e, tanba Joana dehan nia nunka iha relasaun sexual ho ema seluk. Maibé Joao dehan katak nia laos aman ba bebe oan ne'e, Joao desidi atu ba Dili hodi hela hamutuk ho familia no iha ne'eba nia hetan servisu hanesan kaixeru ba loja no dehan nia lakoi atu kaben Joana.

Joana iha ona feto naran Daniela maibé nia senti la iha meius atu hakiak Daniela.

Bainhira Daniela tinan 8 Joana lori nia ba hela ho ninia tia Maria iha Dili. Joana la fo osan ruma no la tau matan ba Daniela. Joana fila fali ba Oecusse deit. Maria iha labarik barak no la fo apoiu ruma ba Daniela. Daniela la bele ba eskola no tenki halo servisu barak iha ninia tia nia uma.

Bainhira Daniela tinan 12, Joana mate. Joana nia maun boot Luis dehan nia bele adopta Daniela. Daniela ba fali Oecusse atu hela ho ninia tiu maibé nia la hetan hahalok hanesan Luis fo ba ninia oan. Luis la fo oportunidade hanesan, koalia la diak ba Daniela no uza nia hanesan kriadu, laos oan.

Perguntas:

- 1. Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?**

- 2. Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?**

- 3. Saida mak Parlamentu tenki inklui iha lei atu resolve situasaun ida ne'e ho diak?**

Artigu ne'ebé karik relevante:

Art 1727: Rekonhesementu labarak ne'ebe moris antes kaben (anak haram)

Art 1749: Investigasaun paternidade

Art 1751: Asumpsaun sira ne'ebé aplika ba asuntu paternidade

Art 1754, 1871 & 1872: Dever atu selu alimentu/pensaun

Estudu Kazu 4: Aluga Rai Komunidade

Kompania mina-nu hakarak aluga rai atu halo plantasaun nu iha Timor-Leste. Kompania identifika rai ne'ebé diak ba ai-nu iha komunidade Be'e Metin. Rai ne'e rai lisan. Komunidade tur hamutuk no deside katak sira pronto atu fó aluga rai fuik ba kompania, se kompania promese atu kria servisu ba komunidade.

Inan-aman balun preokupa katak komunidade nia populasaun agora aumenta no tenke asegura katak sira nia oan sira iha asesu ba rai atu halo to'os no uma.

Sira nia hanoin katak aban bain rua sira nia oan no be'e-oan sira presiza kbiit atu deside oinsa uja rai ne'e - se sira la presiza rasik bele halo kontraktu ne'ebé foun no kontinua atu fó aluga rai ba kompania.

Perguntas:

- Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?**
 - Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?**
 - Saida mak Parlamentu tenki inklui iha lei atu resolve situasaun ida ne'e ho diak?**
 - Saida mak tinan maximú ba kontraktu aluga rai ne'ebé ema bele halo?**
 - Se rai privadu, laos komunidade, tenki uze tinan maximu hanesan ka lae?**

Artigu ne'ebe karik relevante:

Art 953: Saida mak aluga rai

Art 957: Tempu maximu atu aluga rai ka propriedade mak tinan 50

Estudu Kazu 5 - Suksesaun

Jose ho Maria moris hamutuk hanesan feen ho laen durante tinan 15. Sira la kabé formal maibé hetan konsiderasaun husi komunidade katak sira feen laen. Sira iha oan mane nain 4 no oan feto nain 1. Depois Maria mate.

Liu tiha tinan ida Jose kabé formal iha igreja ho feto segundu, hanaran Marta, no iha oan mane nain 2 no oan feto nain 1.

Jose iha rai luan hektar 50. Liu tiha tinan 5 (ho Marta) Jose mate. Ninja oan sira la hatene rai nee partense ba se'e: oan sira hosi Maria ka hosi Marta, oan sira mane deit ka feto mos.

Antes Jose mate nia la rai hela karta (surat wasiat) ba nia oan sira.

Jose nia oan sira hadau malu ba rai nee. Oan hosi Maria sempre halo presaun, intimidasaun no ameansa ba oan hosi Marta.

Perguntas:

- 1. Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?**

- 2. Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?**

- 3. Saida mak Parlamentu tenki inklui iha lei atu resolve situasaun ida ne'e ho diak?**

Artigu ne'ebé karik relevante:

Art 1888: Saida mak susesaun

Art 1999 & 2000: Ema ne'ebé iha direitu atu simu propriedade se la iha karta

Art 2006: Oinsa fahe propriedade entre kaben no oan sira

Estudu Kazu 6: Ai-horis

José maka to'os nain. Nia kuda batar, ai-farina no ai-horis balun. Tinan sanulu liuba, José husu nia primo Ortelio se nia bele uja Ortelio nia rai balun atu kuda ai-hun hanesan ai-haas, ai-kulu no ai-nu. Ortelio loke dalan ba José atu uja rai no ai ne'e boot ona. Ortelio foin kabon no agora nia presiza rai ne'e atu halo uma, to'os no kuda ai-hun.

Perguntas:

1. Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?
 2. Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?
 3. Saida mak Parlamentu tenki inklui iha lei atu resolve situasaun ida ne'e ho diak?

Estudu Kazu 7 – Direitu ba rai bainhira kabem

Maria tinan 34 ona no ninia kabon mate fulan 9 liu ba. Sira kabon tinan 15 ona. Maria iha oan nain 5 no hela iha uma ne'ebé ninia kabon simu hosi ni-nia inanan-aman bainhira sira mate. Maria no ninia oan servisu nudar agrikultor maibe sira presiza mos ajuda hosi Maria nia laen nia alin (Cunhadu) naran Augostinho. Agostinho dehan katak nia hakarak atu uza uma no rai ne'ebé Maria ho nia oan hela ba tanba ne'e direitu Agostinho nian mos, ida ne'e katak Maria no ninia familia tenki sai husi uma no rai eransa ne'e.

Maria lakoi atu sai hosi uma ida ne'e, tanba nia ho nia oan mos direitu ba fatin ne'e, se karik sira tenki sai mos nia lahatene atu ba hela iha nebe.

Perguntas:

1. Tuir ita bo'ot sira nia hanoin, akontesementu ne'e akontese iha Timor Leste ka lae? Maeneira saida mak ita bo'ot sira sei halo atu resolve situasaun hanesan ne'e?
 2. Karik iha ita bo'ot sira nia hanoin maneira hodi resolve problema hirak ne'e diak ka lae? Se la diak tamba sa?
 3. Saida mak Parlamentu tenki inklui iha lei atu resolve situasaun ida ne'e ho diak?

Artiqu ne'ebe karik relevante:

Art 1559: Equalidade fen laen.

Art 1610: Rejime riku-soin bainhira kaben

Art 1999 & 2000: Ema ne'ebé iha direitu atu simu propriedade bainhira ema mate

